



INTRODUCZIUN

DA SUR MARTIN BEARTH

Suenter la miracla culs pauns e culs pèschs ei Jesus navigaus a Cafarnaum da l'otra vart dil lag. Il pievel che Jesus veva spisgentau il di avon ha puspei fom e spetga ch'el detti ussa paun ad els. Mo Jesus di: «Jeu sun il paun dalla veta. Tgi che maglia mei vegn a viver entras mei» (cf. Gn 6,51). Quels plaids da Jesus han biars da ses giuvnals buca capiu, han priu scandal e bandunau el. Sinaquei damonda Jesus ils auters: «Leis era vus ir naven?» (Gn 6,67). La risposta da Simon Pieder fa surstar: «Segner, tier tgi duein nus ir? Ti has plaids da veta perpetna. Nus vein cartiu e savein: Ti eis il Sogn da Diu» (Gn 6,68s). Gie, Segner, tier tgi duein era nus dad oz ir, cu bia ei per nus nuncapeivel e stgir e grev? Ti has plaids che dattan veta e speranza, per ussa e per adina.

EVANGELI

Gn 6,60–69

⁶⁰Udend quei, han biars da ses giuvnals detg: Ses plaids ein dirs, tgi po tedlar els? ⁶¹Savend Jesus che ses giuvnals murmignavan pervia da quei, ha el emparau els: Prendeis vus scandal da quei? ⁶²Tgei pér lu, cu vus veseis il Fegl dil carstgaun ad ascender leu, nua ch'el fuva avon? ⁶³Il spért ei quel che dat veta; la carn vala nuot. Ils plaids che jeu hai detg a vus ein spért e veta. ⁶⁴Denter vus ein denton enzacons che creian buc. Jesus saveva gie d'entschatta enneu tgi che creigi buc e tgeinin che vegni a tradir el. ⁶⁵Ed el ha cuntinuau: Perquei hai jeu detg a vus: Negin sa vegnir tier mei, sch'igl ei buca dau ad el dil Bab.

⁶⁶Da cheu naven ein biars da ses giuvnals seretratgs ed han buca cumpignau el pli. ⁶⁷Cheu ha Jesus detg als dudisch: Leis era vus ir naven? ⁶⁸Simon Pieder ha dau per risposta: Segner, tier tgi duein nus ir? Ti has plaids da veta perpetna. ⁶⁹Nus vein cartiu e savein: Ti eis il Sogn da Diu.